

馬相輯要

全二冊

ORIENTALIA
CHINESE
G376.2
M13

1
G376.2
M13

馬相輯要

丘文莊曰易之爲書以明陰陽其取諸物也無所不
有而於馬獨詳焉孔子爲乾既以利牝馬之貞以取
象而爲大畜又取乾之象以稱馬蓋以天地間動物
莫健如龍而馬次之龍非可畜之獸而世不常有就
地而論之健而不息者皆莫如馬也故於大畜之馬

則謂之食良者稟純陽之氣而有剛健之才者也其
間坤之牝者雖曰其陰之質而其所以爲性者則從
一而不變亦有徒德存焉以馬之健者屬乾而牝則
屬坤坤者乾之對言馬於坤明其爲乾之配也是以
雜卦之中八卦所取之物惟一二見獨於馬凡三取
之於物惟至於馬則其質之良齒之老形之瘠色之
異性之偏無所不具以見馬之爲物於畜類中最健
而且大人世所不可無而有天下國家者必畜之以
爲治具者也

曲川曰混元初開始有二龍于東海屈山而出指山
爲姓一名屈強一名屈女子女子生飛兔飛兔生麒麟
麟麒麟生馬天皇氏起號曰龍駒後因食人黃帝命

董仲仙摘其膽汁息其蹄齒更名曰馬稽此則馬本
于龍種產于東海名于黃帝又云混沌初分天地始
闢午丑之象各從天地而生午者陽火也應乾象而
生馬丑者陰土也應坤象而生牛易經云乾象爲天
坤象爲地而馬牛應之馬者上應于天稟清氣而膽
氣不足牛者下應于地稟濁氣而齒氣不足此謂天

地陰陽清濁之分矣伯樂云馬飲清而溺濁牛飲濁
而尿清亦謂天地之分矣師皇云馬者物類也稟陰
陽之末半受五氣而少金火有餘而水不足又曰馬
者稟清氣於天受元氣于丙生於寅宮產于午度象
屬陽伯樂亦曰人受氣于癸馬受氣於丙丙者陽火
也又云馬火畜也廼受氣于丙生于寅旺于午伏于

戎象本離宮稽此以上數論則馬象屬火五臟純陽
可知矣故其性強急而不恤力奈寒而畏熱其當知
之

隋文帝時大宛國獻千里馬駿曳地號曰獅子驄上
置之馬群陸梁人莫能制即將裴仁基曰臣能制之
遂攘袂向前去十餘步躡身騰上一手撮耳一手握

目馬戰不敢動乃跨乘之朝發西京暮至東洛隋末

不知所在唐文皇勅訪之同州刺史宇文士得於朝

邑市麴家挽磴驥尾焦禿皮肉穿穴見之悲泣帝自

出長樂坡馬到新豐向西鳴躍帝甚喜齒口並平飼

以鍾乳仍生五駒皆千里足也後不知所在

朝野
余載

慕容廆有駿馬赭白有奇相逸力至雋光壽元年四

十九矣而駿逸不虧雋奇之比鮑氏驄命鑄銅以圖其像親爲銘贊鐫頌其傍像成而馬死矣

北史

唐太宗舞馬四百蹄分爲左右部有名曰某家驕其曲曰傾盃樂皆衣以錦綉絡以金銀每樂作奮首鼓尾縱橫應節

開元遺事

其一曰拳毛騶黃馬黑喙平劉黑闥時所乘前中六

箭背三箭贊曰月精按轡天駟橫行弧矢載戢氛埃廓清其二曰什伐赤純赤色平世充建德時乘前中四箭背中一箭贊曰湮澗未靜斧鉞伸威朱汗騁足青旌凱歸其三曰白蹄烏純黑色四蹄俱白平薛仁果時所乘贊曰倚天長劒追風駿足聳轡平隴回鞍定蜀其四曰特勒驪黃白色喙微黑色平宋金剛時

所乘贊曰應策騰空承聲冲漢入險摧敵乘危濟難
其五曰颯路紫驚騶平東都時所乘前中一箭贊曰
紫驚超躍骨騰神駿氣驚三川威凌八陣其六曰青
騅蒼白雜色平實建德時所乘前中五箭贊曰足輕
雪影神發天機策茲飛練定戎衣六馬圖贊
張飛有馬號烏追時歌曰人中有張飛馬中有烏

追

呂布常有馬號赤兔諺曰人中有呂布馬中有
赤兔

岳武穆嘗入見帝從容問曰卿得良馬不武穆荅曰
臣有二馬曰啖芻豆數斗飲泉一斛然非精潔即不
受介而馳初不甚疾比行百里始奮迅自午至酉猶

可二百里褫鞍甲而不息不汗此其受大而不苟取
力裕而不求逞致遠之材也不幸相繼以死今所乘
者日不過數升而秣不擇粟飲不擇泉攬轡未安踴
躍疾驅甫百里力竭汗喘殆欲斃然此其寡取易盈
好逞易窮駑鈍之材也帝稱善曰卿乃議論極

進綱目

國朝劉馬太監從西番得一黑驢進上能一日千里
又善開虎上取虎城北虎與開一蹄而虎斃又開牡
虎三蹄而虎斃後取開獅被獅拆其脊劉大慟蓋龍
種也

王瓘好驢家畜數頭其價有至百金者其一曰落釵
其二曰遠遊其三曰驚羽其四曰白鳳其五曰臨江

其六曰上雲其七曰奔濤其八曰飛星

下帷短牒

唐咸通中以進士車服僭差不許乘馬時塲中不減千人雖勢可執手亦皆騎驢或嘲之曰今年勅下盡騎驢短袖長鞦滿九衢清瘦兒即猶自可就中愁殺

鄭昌圖 據言

吳元濟判其將有董重質者守洵曲其部下乘騾即

戰號騾子都尉最爲悍官軍恒警備之

湘中記

王良問伯樂曰相馬可得聞乎荅曰馬頭爲王欲方目爲丞欲明脊爲將軍欲強腹爲城郭欲張四下爲令欲長汗溝數欲小如斬竹口中色如日月光者行千里口中有黑者曰啣烏短壽白額入口名梅鴈一

名的盧 國憲家猷

韓文公雜說云世有伯樂然後有千里馬千里馬常有而伯樂不常有故雖有名馬祇辱於奴隸人之手駢死於槽枥之間不以千里稱也馬之千里者一食或盡粟一石食馬者不知其能千里而食之是馬雖有千里之能食不飽力不足才美不外見且欲與常馬等不可得安求其能千里也策之不以其道食之不能盡其才鳴之不能通其意執策而臨之曰天下無良馬嗚呼其真無良馬耶其真不識馬耶

馬援鑄銅馬式進表

夫行天莫如龍行地莫如馬馬者甲兵之本國之大用安寧則以別尊卑之序有變則以濟遠近之難昔有騏驥一日千里伯樂見之昭然不惑近世西河子

輿亦明相法子輿傳西河儀長孺長孺傳茂陵丁君
都君都傳成紀楊子阿臣援嘗師事子阿受相馬骨
法者之於行事輒有驗効臣愚以爲傳聞不如親見
視景不如察形今欲形之於生馬則骨法難備具又
不可傳之於後孝武皇帝時善相馬者東門京鑄作
銅馬獻之有詔立馬於魯班門外則更名魯班門曰
金馬門臣謹依儀氏韜中帛氏口齒謝氏唇髻丁氏
身中備此數家骨相以爲法

銅馬相法

相法曰水火欲分明水火在鼻上唇欲急而方口中
欲紅而有光此馬千里頷下欲深下唇欲緩牙欲前
向牙欲去齒一寸則四百里牙劍鋒則千里目欲滿

而澤腸欲充腠欲小季肋欲長懸薄欲厚也腹下欲
平滿汗溝欲深長而膝本欲起肘腋欲開膝欲方蹄
欲厚三寸堅如石

相馬說

出安驥集

夫毛物之類象矣其引重致遠堪托死生者獨馬可
稱故其行也無疆聖人所以取象於坤也是故龍駒

骨駿驚馬力庸或重之以千金或勉之以十駕惟伯
樂能辨之調其臟腑理其血氣惟師皇能瘳之况茲
爲戎事之本代人之勞其利益非淺鮮也今撫舊聞
相其骨毛貴賤以別其善惡云

相馬論

出虎鈴經

夫馬之初生無毛者能行千里先舉一足者行五百

里但數其肋得十即凡馬也十一十二者五百里十三者千里過十三者天馬也毛起腕上者六百里腹脊上下平者五百里項圓者五百里眼中如童兒並坐者二百里腹下有橫筋者五百里耳根下生角長一寸者三百里二寸者五百里三寸者千里尿射過前脚者五百里頭如鳴鳥者一千里如初生而不能

行才行便能飲水者千里駒也放尿舉足者善走腹下毛逆生者亦然芝蘭孔中有毛長一寸者駑馬也鼻中人字者十八歲四字者八歲八字者四歲鼻上赤者二十歲鼻上青者三十歲鼻上有公王字者二十歲眼圓有旋毛者三十歲目下不滿而白睛多者膽小多驚目白不深唇不覆口又淺不健食齒參

差不相當皆驚馬也凡馬頭欲如側剝耳欲厚小左
耳却害主右耳却不入陣眼圓欲得滿睛額前錐毛
欲濃盛鼻欲大唇欲緩上唇欲方下唇欲圓口欲紅
并方大舌欲如懸鈎胸欲廣雙肋欲分明蹄欲厚膝
欲高前脚欲直後脚欲曲而開腹欲垂陰欲小肚欲方
脰欲垂足足欲無毛尾欲毛散尾根欲齊梁骨而粗
汗溝欲深膊際橫文欲分明脊欲平身欲短毛欲細
而實此馬之要相也

相馬總論

馬有驚驥善相者廼能別其類相有能否善學者廼
能造其微今夫或赤或黃或黑或蒼蟻聚虫集旅走
叢立四散愴悅開合萬狀而善相者掉手飛縻指毛

命物其質之可取者牧蓄攻教殆無遺質自非由外
以知內由粗以及精又安能始於形器之近終遂臻
於天機之妙哉今列相法于其後以俟能者云

相良馬論

眼高似垂鈴望之大就之小齒密琬細筋粗口又深
唇垂臆廣一尺眼上有旋毛蘭孔中有橫筋上下明
徹肋有十四羊鬚中生距如鷄者千里耳小三寸者
此上駟也頭高面如剝兔者良膝大如乳者千里一
歲上下齒生四歲齒黃三十三歲齒白馬以頭為主
眼必欲方腰欲強腹欲垂足欲開展矮壯頭欲長眉
稜骨欲高眼如垂鈴有光艷下臉眼皮欲稱鼻孔欲大
又欲有王火子形口內欲紅膝骨欲圓大耳欲近而

前立小而厚迎鞍欲骨肉相配頸欲長腕欲大而顯
蹄欲厚腹下欲平而有八字尾本欲高大而強尾欲
長而垂者良

相駑馬論

凡相馬之法先辨三羸五駑然後方看他處頭大肩
小者一羸也腰軟肚大者二羸也肩小蹄大者三羸
也頭大耳垂者一駑也頸長直強者二駑也身短腿
長者三駑也脊骨大肋骨短者四駑也三府開散髀
骨上寬下窄者五駑也

相馬寶金歌

三十二相眼爲珍次觀頭面要停勻相馬不看先代
本亦似盲人信步行眼似垂鈴紫色浸睛如徹豆要

分明白縷買睛行五百瞳生五彩壽多齡鼻紋有字
須長壽如火如公四十春壽旋頂門高過眼鬃毛茸細
萬絲分面如剥兔腮無肉鼻如金盞食槽橫耳如楊
葉根一握項長如鳳似鷄鳴口又須深牙齒遠舌如
垂劍色蓮形口無黑鬚須長命唇似垂箱兩合停四
大三高兼二小隻長而短一灣平瘦見肉而肥見骨

視而不懼聽無驚八肉灣而分耳後龍會高而上古
聞牝驕不育偏多驟驛驂踢嚙善能奔頭鈎項曲三
峯穩筋麓骨細四蹄輕鬐高臆廣平弓子胷寬膊濶
小搶風頭長腰短隻鳧大腹垂膝小逆毛生跣停寸
緊蹄堅實膝高節近自然分分者言筋骨分明也肋骨彎而須
緊密排鞍肉厚穩鞍輪腎袋小藏如吊穀袖囊垂大

若懸鈴燕骨隱微三山小胯似琵琶後犬蹲尾似流
星須放細鵝鼻曲直汗溝深骨筋大小須勻壯身形
充闡要寬平已上骨毛皆是駿還將驚逸細推尋腰
四脊弓馬致遠麓蹄捺蹀豈能奔白首緇身須可忌
銀鬃玉頂不須欽破臉孤蹄真未吉耳白腰花實是
凶流鼻絳項休呼美沙睛環眼莫高稱面短肉橫真

實美穆宗

駝高休言

穆宗毅皇帝

可惡眼深無肉不堪親槽微口淺多無食腿麓蹄大
實無行毛殊旋廣休誇貴寸長蹀軟莫稱駿背直尾
高休言美耳大頭肥不足欽羊睛象眼遙無力渚膝
駝腰不奈奔龍顙突目天然快犢頭鹿耳號追風孔
中筋現非常相目有重瞳勿視輕溺而似犬真難得
耳毫一尺值千金初產無毛稱龍子骨角雙生亦號

龍耳微一寸行千里溺過前足半千程羊鬚有距馳
三百距如鷄爪日千程已前貴相分載古典流傳萬
世遵

超逸

馬龍顙突目平脊大腹腓類脂切骨也重有肉此五事備
者千里馬也上唇急而方口中紅而有光此千里馬

也牙去齒一寸者四百里牙劍鋒者千里目中縷貫
瞳子者五百里上下徹或雙瞳人者千里蘭孔中有
筋及長毛者五百里蘭孔者眼上虛處是也目中五采盡具五
百里耳三寸者三百里一寸者千里耳方者千里如

削筍者七百里耳本生角長一二寸千里羊鬚中生
距如鷄者五百里腹下陰前兩邊生逆毛入腹帶者

千里一尺者五百里雙脚脛停者六百里迴毛生疏
馬生墮地無毛者千里溺過前足者五百里溺舉一
足如犬者千里膺下欲廣一尺以上者挾尺能久走
脇肋從後數得十根者良十一者二百里十二者千
里十三者天馬腹下平滿直肉方股薄而博肘腋開
皆善走

形骨

望之大就之小筋馬也望之小就之大肉馬也至瘦
欲得見其肉至肥欲得見其骨馬頸項欲得厚而強
又欲得脰而長頸骨欲大肉次之髻欲得桎而厚且
折季毛欲長多覆則肝肺無病髮厚毛是也鬃欲帶中骨
高三寸鬃中骨也胸欲直而出臆欲廣兩肩不欲深肩肉

欲寧鳧間欲開視之如隻鳧雙鳧欲大而上

胸兩邊肉如鳧

膺下欲廣一尺已上背欲得短而方脊欲得大而抗

脊背欲得平而廣晦筋欲大

晦筋也夾脊筋也

腹欲充又欲平

而廣又欲大而垂結脉欲多大道筋欲大而直

大道筋從

腋也拒

膝欲小膝小則脾小脾小則易養季肋欲張

脇肋欲大而突從後數其脇肋過十者良腹下欲有

八字腹下毛欲向前腹下陰前兩邊生逆毛入腹帶

者駿三府欲齊

三府兩骨也及中骨也

尾本欲大而強尾骨欲得

高而垂臂欲得長而膝本欲起

前脚膝上向前

肘腋欲開髀

骨欲短龍翅欲廣而長升肉欲大而明

髀外肉也

股欲薄

而博虎口欲開

股肉是也

後髀欲廣厚汗溝欲深明直肉

欲方

髀後肉也

輸鼠欲方

直肉下也

肱肉欲急

髀裡也

間筋欲短

而減輪鼠筋機骨欲舉上曲如垂箱

壽夭

馬目中五采具及眼箱下有字形者壽九十鼻上紋如王公壽五十如火四十如天三十如山如水二十如个十八如四字八如宅七旋毛在眼箱上四十在值箱骨中三十在值中箱下十八口中見紅白光如

穴中着火老壽若黑不鮮明盤不通明不壽

頭

馬頭欲高峻如削成又欲得方而重宜少肉如剥兔頭

壽骨欲得大如綿絮包圭石壽骨者髮所生處也嗣骨欲得廉

而潤又欲長嗣骨者頰側小骨也額欲方而平八肉欲大而明

八肉耳下也易骨欲直眼下巴骨也元中欲深耳下牙頰欲開鞅

欲方 欬類前是
鼻梁也

眼

馬眼欲得高又欲得滿而澤大而光又欲得長大目
大則心大心大則猛利不驚目睛欲得如垂鈴又欲
得黃又欲光而有紫艷色箱欲小又欲得端正上欲
弓曲下欲直骨欲得成三角皮欲得厚若目小而多

白則驚畏瞳子前後肉不滿皆惡目不四滿上臉 眼皮
深下臉淺不健食目赤眵亂眼下無肉皆傷人

耳

馬耳欲得相近而前立小而厚又欲小而銳狀如削
竹如削欲促耳小則肝小肝小則識人意緊短者良
若根漫及濶而長者皆驚

鼻

馬鼻欲得廣大而方鼻中色欲得紅鼻大則肺大肺

大則能奔鼻孔欲大素中欲兼而張素鼻孔是水火欲

得分水火在鼻孔兩間

口

馬口吻欲長口中色欲得鮮明上唇欲得急下唇欲

得緩上唇欲得方下唇欲厚而多理上齒若鉤下齒

若鋸頷下欲深喉欲曲而深唇不覆齒少食齒左右

蹉不相當難御齒欲得深而密淺則不能食又欲得

齊而白白則耐齒不滿不厚不能久走斷齧欲得有

辦而明舌欲得方而薄長而大色如朱

蹄

馬足垂薄欲厚而緩脚膝骨欲方而痺又欲得圓而
張大如盂盂跪欲結而促又欲促而大其間終容絆
距骨欲出前附蟬附蟬臨欲大前後目夜鳥頭欲高
鳥頭後足後筋後足輔骨欲大輔足骨者後足足骸之後骨輔肉欲大而明
後脚欲曲而立蹄欲厚而大又欲厚三寸硬如石下
欲深而明其後開欲如鷗翼如蛤有瓏道者軟

齒歲論

夫獸之齒者血精為本結秀為骨骨精為齒一歲至
二十五歲其齒之區白而有其驗也經云齒者乃骨
之精粹如其盛者雖上下咬平猶有鋒刃而齊者行
力依然其壽無可考也但骨氣衰敗不三十歲區俱
平而無鋒刃者雖能食亦無其力也是故駕駿於此

一驗耳 血肉潤毛色精粹壯筋力口齒驗良駿夫
齒者筋力之精華故初生第五年生齒一排與生生
之五數相合其精一歲一生二年而止

秣馬之法必視其齒歷勞逸而調息之馬四年而兩
齒五年而四齒六年而六齒成矣七年而右一齒缺
八年而上下兩邊各一齒缺九年而上下盡缺十年

而下兩齒齧十一年而下四齒齧十二年盡齧十七
年上四齒齧十八年盡齧十九年上兩齒平二十年
上四齒平年之長少惟馬齒最準故人自謙曰犬馬
之齒長矣 國憲家猷

齒歲歌

妳牙無宛爲蹄口四歲當門頂二牙四齒並生總五

歲六週內齒一齊扎七年邊齒絕成舊稍二區爲八
歲賒稍一區方呼九歲黑盡黃存下盡家黑區咬破
方十歲十一上齒犯中花十二十三十四歲上中四
齒盡皆差上下黑區俱咬破十五十六正堪誇下六
黃班中齒白十七十八足無嗟槽驥若交二十歲白
現黃平下四牙下白上黃分兩樣二十二載度年華
良馬歲當四六數黃班添白上中花上下黃班俱已
白三十歲數更還加此是認馬不易方請君着眼莫
教差

口齒訣

一歲駒齒二

二歲駒齒四

三歲駒齒六

四歲成齒二

五歲成齒四

六歲肉牙生

七歲角區缺

八歲盡區如一

九歲咬下中區二齒白

十歲咬下中區四齒白

十一歲咬下中區六齒白

十二歲咬下中區二齒平

十三歲咬下中區四齒平

十四歲咬下中區六齒平

十五歲咬上中區二齒白

十六歲咬上中區四齒白

十七歲咬上中區六齒白

十八歲咬上中區二齒平

十九歲咬上中區四齒平

二十歲咬上下區盡平

二十一歲咬下中區二齒黃

二十二歲咬下中區四齒黃

二十三歲咬下中區六齒黃

二十四歲咬上中區二齒黃

二十五歲咬上中區四齒黃

二十六歲咬上下盡黃

二十七歲咬下中區二齒白

二十八歲咬下中區四齒白

二十九歲咬下中區六齒白

三十歲咬上中區二齒白

三十一歲咬上中區四齒白

三十二歲咬上下盡白

旋毛解

百一歌遺旋毛之害旋毛論叙順逆向背之理乃謂馬初生無毛者良骨角雙生者良體無旋毛遠看大近看小者良旋毛細膩溫鮮者良以此定品凡毛毳

軟溫潤有文理未易見故此圖善旋五所謂若減若沒若亡若失也惡者粗逆易見故此圖惡旋十四所謂毛病最爲害者也凡毛重首次頸次尾次背次腹善旋首壽星齒長德力優頸帶纓俊逸腹靠槽克肥背乘鐙安重近尾賺花矯強皆健行馴善惡旋各有病傷人害物首口啣禍聽哭背騰蛇腹喪門慘激于

前背駝屍尾喪門拖喪挾屍狼厲于後最傷害不可負
載口滴淚頸鎖喉背穿髻盛淚帶劍尾豹尾亦傷害
不自保又牛額甚凶不宜養招殃債事市馬者知之
飾偽擦揉去難別最宜慎防又善多惡少者猶可惡
多善少者次之皆惡者勿用或按勒制之亦能去惡
爲善也

旋毛論

旋毛在上者向下在下者向上在左者向右在右者
向左凡上左者屬陽向下向右者陽數順也下右者
屬陰向上向左者陰數逆也逆者陰順之謂非違逆
也旋毛合天地之數五十五天数二十五地數三十
白圈皆陽左旋黑圈皆陰右旋上而向下下而向上

左而右右而左上下左右黑白順逆一一分明所以
成變化此古之龍馬爲靈物也他馬則不然矣他馬
亦有旋毛如上下左右向之順者爲善其反背橫差
皆惡也

馬毛利害

若馬或白點入口者名的盧目下有橫毛者名灰泣

旋毛在吻後者名啣禍白馬黑駮鞍下有回毛者名
負屍腋下有回毛者名挾屍左脇下有白毛直上者
名白帶劒汗溝過尾根者踏殺人腮上有旋毛者名
目圍或後足左右白者或馬渾白而四蹄黑者或從
前膊外從項去到腴腮有毛旋者或毛旋在項者或
爪黑面白者以上毛病不利主也或馬前兩甲膊後

近低處毛逆者能行五百里後眼近前低處毛逆者
行三百里後前膊到喉中有逆毛者名印綬能行千
里兼益主也

丘文莊曰古人之養馬必順其四時冬之寒也則藉
之以蓐春之煖也則除去之然又恐其所居之廐積
糞穢之久而或足以致馬疾故殺牲以血塗之而後

以居焉冬之寒也則燠之以廐夏之炎也則涼之以
廐其養也殆無異于人則其馬安得而不壯盛哉
又曰芻以食馬牧以放馬皆所以養之也周官設官
以掌王馬之政不惟有政而又有教有養焉政以正
之教以導之而養以安之也養之則生息多而壯健
教之則性習馴而調和是故馬質校人掌其政者也

趣馬巫馬牧師圉師圉人則以養之而庾人則又所以教之者馬

芻水論

凡飲喂芻水者其則有三故云三飲三喂也夫三者一曰少飲半芻二曰忌飲淨芻三曰戒飲禁芻是故少飲者飢腸休飲足疋羸休飲足妊娠休飲足半芻

者飢腸休喂飽出門莫喂飽遠來亦忌飽此謂一飲一喂也忌飲者濁水休教飲惡水休教飲沫水休教飲淨芻者穀料須當節灰料須當潔毛髮須當擇此謂二飲二喂也戒飲者騎來不得飲料後不得飲有汗不得飲禁芻者膝大休加料騎少休加料炎暑休加料此謂三飲三喂也夫喂飲而有此三者則馬驟

四時無患任意騎習矣內經云凡乘者一日行二日
驅三日驟四日馳五日奔終而復始千里無患病遠
來有汗捧行喘定汗息放鞍即時放驟繫於迎風勿
近舍簷移時方喂凡喂者冬暖屋夏涼棚面南拴勿
北繫節籛豆谷凡有砂石灰塵蛛絲毛髮務于潔淨
日令觀其形狀夜則聽其喘息較驗草料多寡詳察
疾病有無此謂蓄養之道也但如尿清糞潤鼻氣溫
和脉呼三至唇舌鮮明皮毛光彩體健神清頭尾不
動輪歇后蹄如此則為無病之狀是飲喂得其則也
是故觀外形察內受芻水有節飲喂有三使馬驟不
致夭橫而終其天壽也

三飲三喂芻水歌

屎清糞潤號平和草多水少大無疴槽間穀料休多
喂源下清泉少飲過迎風有汗俱教忌遠驟空腸莫
令多喂向坎宮多生患廐克簷巷亦招病草中毛髮
宜須擇料間灰土莫容阿泥土妄食膝易瘦髮毛誤
食嗽啞多騎來喘定移時喂喂後依期飲碧波飲後
徐徐行百步生料勻勻莫令多三般喂飲遵法則諸
病消磨氣血和

馬忌

石灰泥槽損馬繫馬於門上令落駒養獼猴能辟惡
并去疥癬戊寅庚寅日不可作廐作之者一年凶丙
寅日不可出入三年人馬俱死申日不宜取馬必死
戊午庚子日不取并忌入廐大敗凡養馬之法當擇

日時之良而知所忌